

# Hini Penhod na an Hapiton

**Aaron** Hi Aaron ja hija hini panguluwan Moses an temmolong ay hija chin pangekakan cha hachi Hudju ad Egypt. Hija hini pengpenghan chi natakhay an pachin chi Hudju. (Exodus 4:14-16; Exodus 40:12-13)

**Agripa** Hija hini nangngachan hi Herod Agripa II. Chin A.D. 53 ja ente-a na an mun-ap-apo ad Abilene ja ad Traconite. Hija hini enajakhan Gobernador Festus ta ne-egngor chin kason Paul hi i cha ponhahapitan. (Acts 25:13)

**Agustus** Hitay hini pungngachan cha ay Emperador Gayus Octavius an nun-ap-apo ad Rome nete-a chin 27 B.C. ingkhana chin A.D. 14. Hijay Emperador chin nitu'khungan Hesus. (Luke 2:1)

**Altar** Hitay hini khun cha pamoolan hana midaton ay Apo Jos. Chin nahnahun an altar an mapfaha ay ni Da-an an Tulag ja chin enephod Noah (Genesis 8:20), ja gwacha khu chin enephod Abram (Genesis 12:7). Hay enat na an nangapja ja una inator hachi pfato. Gwa han chugwan altar an empethod Apo Jos ay Moses ta gway

usaron cha hichi Tabernakulo an khun i pundayawan ay Apo Jos. (Exodus 25:23; 27:1) Chugwa khu han altar an gawwa hichi templo chin timpon Hesus. Hini oha ja gwa hichi partug ni templo, an hay apja na ja ajiw ja nidchuman hi copper. Ja hitay chi khun cha pamoolan hi animal an midaton ay Apo Jos. Hini oha ja gwacha hichi hikhup ni templo an hay apja na ja ajiw ja nidchuman hi pfallitu'. Ja hitay hini khun cha pamoolan ay ni insenso.

**Amen** Hapit chi Hebrew an hay penhod na an hapiton ja umannong, mapagtarkan, ja nehamad. Napfalin ayya hay kalalag cha ja idchum cha an allon hi, Amen, ti penhod cha an ipa-annong adni' Apo Jos hini empfokha cha. (1 Kings 1:36; Romans 16:27)

**Angher** Hana maphod an angher ja achi cha matikhaw ja un cha khun munserbi ay Apo Jos. Ja khuna pfaalon chicha ta aton cha hini penhod na. (Hebrews 1:7) Hay hato angher ja cho-odcho-or cha, ja otong hini apfalinan cha. Gwa khu hana napukhit an angher an ma-ali hi napukhit an ispiritu wenna dimonyo. Chicha hachi

nidchum ay Satanas an pfimmuhur ay Apo Jos chin agkhuy pay narmugwan tay lota. (Matthew 25:41) Hijaot un penakak Apo Jos chicha ad langit. (2 Peter 2:4)

**Apostol** Hato an apostol ja chicha hana 12 an adalan Hesus an pinili na an ay muntih tikhu hana tatakhu ay ni oma'-atana. (Matthew 10:2) Na-aan hi Judas an nangngina ay Hesus, ja napili hi Mattias ta nepallog ay hija. (Acts 1:26) Numpatikhaw hi Apo Hesus ay Saul ja enhaad na hija hi apostol. (Romans 1:1) Hana uchumna an pengpenghan chi namati an khun mangaskasaba ja ma-ali cha khu hi apostol, nidchum hi Barnabas (Acts 14:14).

**Arkhaw chi ngilin** Hini arkhaw an pun-enanaan hachi Hudju ja Hapfachu. Mepagwa ay ni urchin Moses chi muntamu wenna chumalan hi nebtaw ay tay arkhaw chi ngilin. (Exodus 20:8-11) Hini ugwalin chi Hudju ja mete-a hini ngilin ay ni Alemana hi alimhan ni arkhaw ingkhanah Hapfachu hi alimhan ni arkhaw.

**Artemis** Han oha an didiosen an khun dayawon chi Griego. Gwa han templo an khun cha pundayawan ay Artemis ad Efesus. (Acts 19:35) Hini ngachana hi Latin an hapit chi eRome ja Diana.

**Asufre** Hitay asufre ja mun-akhub ja munnaud an lumahu hu-un mapoolan. Gwa

han asufre an khun chumalang ay ni pangtuuchan Apo Jos ay cha Satanas ja an amin hana tatakhu an nahugi an madusa. (Apokalipsis 19:20)

**Baal** Han oha an didiosen an khun dayawon hachi eKana-an. Hija anu hini gway apfalinana an mangpaphod hi nitanum ja hana khun cha pe'pangan. Khun cha onngan ja pfehtaan. Chin immajan hachi Hudju ad Kana-an ja chin-ug cha hini umannong an Jos cha, ta ni'-ampoy cha hachi eKana-an an mundayaw ay Baal. (Judges 2:11; Romans 11:4)

**Baybay ad Galilee** Hitay an baybay ja numpfattanana ni probinsyan chi Galilee ay ni Himpolo an Siudad. Hini enotong na ja 21 x 13 kilometlo. Hitay Baybay ad Galilee ja hihiya an hija khu hini ma-ali an Baybay ad Genesaret ja Baybay ad Tiberias. (John 6:1; Luke 5:1)

**Beelzebub, Beelzebul** Hitay ja han pungngachan cha ay Satanas an hija hini Diablo. (Matthew 10:25)

**Chalom** Hitay hini Hades an pungngachan chi Griego ay ni gwachaan hana nun-atoy, ja Sheol hi hapit chi Hudju. Hay pammatin hachi Hudju chin timpon Hesus ja an amin hana lennagwan chi natoy ja umuy cha ad Sheol wenna Chalom. Ja allon cha an gwa hini Paradise wenna gwachaan

Abraham an nidchum ad Chalom, an hijay omajan hana ipfilang Apo Jos hi maphod. Ja gwa khu hini allon cha an Gehenna an nidchum ad Chalom an omajan hana napukhit an tatakhu. (Matthew 11:23.)

**Chanum chi ubas** Hitay ja hini pfajah chi Hudju. Na-apja hi chanum chi ubas an narpoh ja oma'-at hi pfajah hini atona an pfumutong. (John 2:3)

**Denarius** Hitay ja pihu chin timpon Hesus an hay pfallor na ja hini pfino'lan chi ohay takhu hi hen-arkhaw. (Matthew 20:2)

**Diablo** Hini pangulun an amin chi dimonyo wenno napukhit an ispiritu. Hi Satanas chi ngachana. (1 Peter 5:8)

**Dimonyo** Hana dimonyo wenno napukhit an ispiritu, ja chicha hana pun-i-ibpfan Satanas an khuna honakhon ta aton cha hini penhod na. Chin hunhunana ja chichay angher Apo Jos ad langit, muti chin pfimmuhulan Satanas ay Apo Jos ja ne'-op cha ay hija, hijaot un penakak Apo Jos chicha ad langit. Gway apfalinan hay hato dimonyo an mangchat hi chokhoh ja mapfalin an meho'long cha ay ni ohan takhu. Cho-or hana nehoho'long an napupukhit an ispiritu an penakak Hesus chin agawwachaana heto lota, ta matikhaw an ot-ottong hini apfalinana mu hay hana

dimonyo. (Matthew 8:16; 12:24-26)

**Emperador** Hitay hini pangali cha ay ni mun-ap-apo ad Rome, nidchum hachi cho-or an pfuglay an enapfak chin hinchalon chi Rome, ja nidchum khu chin pfuglay hachi Hudju. Gwa hana enhaad na an tomolong an mun-enchog ay cha tay an pfuglay, amat ay cha Ari Herod ad Israel ja hi Gobernador Pilatus ad Judea. (Acts 25:21)

**Faraon** Hitay hini pangali cha ay ni Ari ad Egypt chin nahop. (Acts 7:10)

**Farisee** Oha cha an grupon chi Hudju. Hini penhod tay ngachan an Farisee an hapiton ja nilahin. Hay pachot-anan cha ja hini pangunuchan cha ay ni urchin, ja hana ugwali an inidchum cha ay ni urchin hi at hichi an atagwotagwon, ja achi cha khun midchum hana uchumna an tatakhu an pfu-un Farisee. Achi cha cho-or, an un cha lemay lipfu wenno unum chi lipfu chin timpon Hesu Kristo, muti otong hini apfalinan cha. (John 3:1; Acts 23:8) Hi Apostol Paul ja oha an Farisee chin agkhuy na pay namatiyan. (Philippians 3:5)

**Griego** Hana tatakhu an nunheto ad Akaya ja chichay ma-ali hi Griego. Hini hapit chi Griego ja ma-awatan chin mano'cho'-or an tatakhu chin

tempon tay Baro an Tulag, ja hitay hini hapit an inusar ni mano'cho'-or an khun muntula' hi libju. (John 12:20; Acts 16:1)

**Hebrew** Hitay ja oha an pungngachan cha hachi holag Abraham an Hudju. Hini hapit hato Hudju ja Hebrew. (Genesis 14:13; Genesis 40:15)

**Hentil** An amin chi takhu an pfu-un Hudju ja ma-ali cha hi Hentil. (Romans 3:29)

**Hermes** Oha an didiosen an khun dayawon chi Griego. (Acts 14:12)

**Herod Agripa I** Hijay apon chin Natakhay an Herod, ja amuna-on Herod Antipas. Hija chin nangpapatoy ay Apostol James, ja nangpapfalud ay Apostol Paul. (Acts 12:1) Nun-ap-apo hija ad Iturea ja Traconite nete-a chin 37 A.D. ja nidchum ad Judea, ad Samaria ja ad Abilene chin 41 A.D. ingkhana chin natajana hi 44 A.D.

**Herod Agripa II** Hitay an Herod Agripa ja empfalay chin oha an Herod Agripa. Hijay nun-ap-apo hana uchumna an pfuglay an gwachaan chi Hudju nete-a chin 53 A.D. ingkhana hi 70 A.D. (Acts 25:13)

**Herod Antipas** Hija ja empfalay chin Natakhay an Herod. Umu-udchum hon inali cha hi Ari (Mark 6:14) muti hini haad na ja un amat hi gobernador. Hijay nangpapfalud ja nangpapot

chinulun John Bautista. (Matthew 14:1-12)

Nun-ap-apo hija ad Galilea ja Perea nete-a chin 4 B.C. ingkhana hi 39 A.D.

**Herod Arkelaus** Hija ja oha khu an empfalay ni Natakhay an Herod. Nun-ap-apo hija ad Judea, Samaria ja Idumea nete-a chin 4 B.C. ingkhana chin 6 A.D. (Matthew 2:22)

**Herod Philip** Hija ja empfalay khu ni Natakhay an Herod. Nun-ap-apo hija ad Iturea ja Traconite nete-a chin 4 B.C. ingkhana chin 34 A.D. (Luke 3:1) Hijay nangahagwa chin pfupfai an penloh ibpfa na an hi Herod Antipas. (Mark 6:17) Tikhan khu hini Natakhay an Herod.

**Herodians** Hachi Herodians ja grupon chi Hudju chin timpon tay Baro an Tulag. Hay penhod cha an mun-ap-apo ay chicha ja hay holag chin Natakhay an Herod ta pfu-un hay gobernador an eRome. Hachi ayya Farisee ja achi cha podhon an mun-ap-apo hay enhaad chi eRome ay chicha an Hudju, muti ni'-apfulut cha chin achi pamhochan hachi Herodians ay Hesus. (Mark 3:6)

**Higos** Hitay ja kalahin chi pfunga an penpenhod hana tatakhu an khun anun. Hini ajiw an higos ja homapfong ja un tumupfu. Hotti nu cho-or chi tupfu na ja expectaron cha an gway pfunga na. Muti umu-udchum ja masapa an

makhah hini pfunga na, hotti un hini tupfu na chi nahagwar. (Mark 11:12-14)

**Hudju** Chicha hana holag Abraham an pinilin Apo Jos hi tatakhu na. Chicha khu hana ma-ali hi holag Israel, ti oha hitay Israel an ngachan Jakob an apon Abraham. Hi Hesu Kristo an Empfalay Apo Jos ja Hudju khu hija. (Matthew 27:37)

**Impferno** Hitay hini omajan cha Satanas ja an amin hana agkhuy namati an humarjaon Apo Jos ta madusa cha. (Matthew 10:28) Hitay hini gwachaan ni apoy an achi madmachop. Hitay khu hini allona an ampfilog an pfannaw an gwachaan chi asufre an khun munchalang.

**Insensio** Hitay insensio ja na-apja hi lotan chi ohah ajiw ja mumpfango hu-un mapoolan. Khun usaron hachi Hudju ay ni pundayawan cha ay Apo Jos. Ananonanong ja mahilip hon khun torkhan ni ohan pachi han insensio ay ni altar hichi templo. (Luke 1:9)

**Israel** Hitay hini oha an ngachan Jakob an nangholag hachi Hudju. Hotti hachi Hudju ja nangadnan cha khu hi holag Israel wenna Israelitas. Ja hija khu hini ngachan ni pfuglay cha. (Romans 9:27; Matthew 2:20)

**Jakob** Hi Jakob chin empfalay Isaak an empfalay Abraham. Hini khu oha an ngachana ja Israel. Hijay nang-empfalay chin himpolo ta chugwa an

linala-e an nangholag hana himpolo ta chugwa an tribon chi Hudju. (John 4:5)

**Kugit** Hachi linala-e an empfpafalay chi Hudju ja makugit cha ay ni me-agwalo an arkhaw mete-a ay ni nitu'khungan cha. Hitay chi panginnilaan chin ne'tobpfalan Apo Jos hay hachi tatakhu na an Hudju. (Genesis 17:9-14; Luke 1:59)

**Klaudius** Hija chin Emperador ad Roma nete-a chin 41 A.D. ingkhana chin 54 A.D. (Acts 11:28; 18:2)

**Korona** Hini ihu'lub ni ohan ari an mangpatikhaw an gway apfalinana an mun-ap-apo, om-omod hana timpon chi occasion. Hini mano'cho'-or an korona ja apja nay pfalito', ja na-artiyan hi napfalar an pfato. (Apokalipsis 4:4)

**Kristo** Kristo ay ni hapit chi Griego ja hitay hini Mesias ay ni hapit chi Hudju. Hini penhod na an allon ja hini enhaad Apo Jos an mun-ap-apo. Hi Hesus ja nangadnan hi Kristo ti hija chin hennag Apo Jos an manakhu hi tatakhu ja an mun-ap-apo ay chicha.

**Lakotta** Han it-ittang an pfugwa muti omotong an umajiw. Hini ayya lakotta an khun cha itanum hichi pfuglay chi Hudju ja ingkhana hi apat hi mitlu hini inanchu-oy na. (Matthew 13:31)

**Latin** Hitay Latin ja hapit chi eRome, an chicha hana khun

mun-ap-apo ad Israel chin timpon tay Baro an Tulag. (John 19:20)

**Levi** Hi Levi ja oha an empfalay Jakob an lala-e. Hana holag Levi ja chicha hachi khun tomolong chin tamun chi pachi hichi templo. (Hebrew 7:5)

**Mana** Hitay chi khun ichat Apo Jos hi anun hachi Hudju chin i cha chimmallachallanan hichi let-ang hi apat chi polo an tagwon. Hini tikhaw na ja amat hi it-ittang an pfugwa an mapuchaw, ja munlameeh hu-un anun. Khun marpu ad uchu hi nun lapfi. (Numero 11:7-9; John 6:31)

**Mehtolon chi urchin Moses** Chicha hana khun manalimun ay ni nitutula' an Hapit Apo Jos. Anila cha hana penhod na an hapiton, hotti khun cha ituchu hi tatakhu. (Matthew 7:29)

**Mesias** Hitay allon chi Hudju an Mesias ja hija hini allon cha an Kristo ay ni hapit chi Griego. Hini penhod na an allon, ja hini enhaad Apo Jos an mun-ap-apo. (John 1:41)

**Mira** Han mumpfango muti mumpa-it an lotan chi ajiw an pfallolan hachi Hudju. Hay oha hi pe-usarana ja ipa-inum cha nu gway chomkhoh ay ni achor cha ta mangmanghan hini male'na cha an chokhoh. (Mark 15:23) Hay oha khu hi pe-usarana ja ebalsam cha hi natoy. Khun cha idchum ay ni pfinacha an i cha iputtiput ay

ni achor ni natoy. (John 19:39)

**Munhenger hi pakha** Hay hato hana Hudju an khun herchuwan chi eRome an munhenger hi pakha hana papadchung cha an Hudju. Hini pakha an khun cha hengelon ja un cha ipaw-it ad Rome ja khun cha khu hulukan hini hingilon cha. Hotti apfopfohor hi pannig chi tatakhu ay ni khun munhenger hi pakha ja ipfilang cha hi napfahulan. (Luke 3:12-13)

**Natakhay an Herod** Hija hini Ari ad Israel chin a-ung-ungngan Hesus. (Matthew 2:1) Nun-ap-apo hija nete-a chin 37 B.C. ingkhana hi 4 B.C.

**Natakhay an Pachi** Hini pangulun an amin hana pachin chi Hudju an khun munserbi ay ni templo hichi ad Jerusalem. Hay oha hi tamu na an achi khun aton chi uchumna an papachi ja mamengpenghan hi ohay tagwon an humikhop ay ni Na-assantuwan an Kwarto ay ni templo, ta ijuy na hini chalan chi animar an idatona ay Apo Jos ta mapakawan hana pfahor na ja hana pfahor hachi Hudju. Chin timpon chi Da-an an Tulag ja khun mepfanoh hini haad chi natakhay an pachi, hotti khun mepallog hini lala-e an empfalay chi Natakhay an Pachi ay hija. Muti chin

nun-ap-apugwan ni Ari an Herod ja hijay khun mangehaad hi natakhay an pachi. Hini natakhay an pachi ja hija khu hini palakhintin hachi petoy polo an pangulun chi Hudju an ma-ali hi Sanhedrin. (Matthew 26:3)

Hay oha an ituchun ni libju an Hebrews ja hi Hesu Kristo hini Natakhay an Pachi ta-o an namati, ti indatona hini mismo an achor na an pfajad hana pfahor ta-o ja hijay mangeta'chokhan ay chita-o hi presencian Apo Jos. (Hebrew 3:1; 4:14-16; 6:20; 8:1-6)

**Na-ilangitan an Takhu** Hitay chi oha an pungngachan Hesu Kristo ay ni achor na. Na-ala hitay ay ni Hebrew an hay literal an allona ja “Empfalay chi Takhu.” Muti pfu-un hini nangto'khongan Mary chi podhona an hapiton ja angkhay, ti hay khu podhona an hapiton ja hija hini Apo an napfagto an mangeta'chokhan ay chita-o an tatakhu. (Matthew 8:20)

**Pachi** Hana papachin chi Hudju ja chicha chi khun mangpacto' ay ni pundayawan chi Hudju ay Apo Jos hichi templo. Chicha ja angkhay chi gway apfalinan an mamarti hana animar an midaton ay Apo Jos, ja an mamoolan ay ni insenso. Khapu ta cho-or cha ja nagrupo cha hi chugwam polo ta han apat an grupo, ja khun cha mumpenpenalog an munserbi hichi templo. Khun

himpfulan hini punserbiyan ni ohan grupo. Nu gway takhu an mipfilang hi achi maleneh, an amat hana na-unit, ja chicha khu chi gway apfalinana an mangali hi nalenehan hinuy an takhu. (Matthew 8:4)

**Pangngarig** Hitay ja han estorya an gwa han ituchu na. Pangngarig chin enat Hesus an nuntudtuchu ay ni oma'-atan ni Pun-ap-apugwan Apo Jos. (Matthew 13:3)

**Pilato** Hi Pontius Pilato ja oha an eRome an hijay gobernador ad Judea, Samaria, ja Idumea nete-a chin 26 A.D. ingkhana hi 36 A.D. Hija chin nanugi ay Hesus an mepfakhat hichi krus. (Mark 15:1)

**Pfarkon Solomon** Hitay ja han ampfilog ja nangato an pfarkon an nunlene'gwoh chin partug chin templo. Hana tu-ud na ja 12 an mitlu. (Acts 3:11)

**Pfehta an Panginomnoman cha chin Nalohan chin Angher Apo Jos chin A-apo cha ad Egypt**

Hitay ja pfehtan chi Hudju an me'chehhan ay ni me-ahimpolo ta han apat an arkhaw ay ni pfulan Nisan (April 1). Aton cha hitay an pangnomnoman cha chin nakakan chin a-ammod cha an himpfut ad Egypt. Gwa han angher an hennag Apo Jos an mamatoy hana panguluwan an empfapfalay hachi e-Egypt, muti inlahiyana hana empfapfalay hachi Hudju.

(Exodus 12:1-13; Matthew 26:17-29)

**Pfehtha an Pangephochan cha hi A-ab-abpfong** Hitay an pfehtha ja ohay markhachu. An amin chi Hudju ja mun-ephod cha hi ab-abpfong ta hijay punnangngan cha. Aton cha hitay ta pangnomnoman cha chin khun pfumagwiyen chin a-ammod cha an Hudju hichi let-ang chin nakakan cha ad Egypt. (John 7:2)

**Pfehthan an Pangnomnoman cha chin Nangdatunan cha ay ni Templo** Hitay ja pfehthan chi Hudju an umuy hi gwaloh arkhaw, mete-a ay ni arkhaw an 25 ay ni pfulan Kislev (December 10). Chin 168 B.C. ja gwa han Ari ad Siria an numparti hi pfpafuy ay ni altar ni templo cha an Hudju, ti anila na an angangaja hana pfpafuy ay chicha, an paniyaw chi ihcha ja mepagwa hi idaton ay Apo Jos. Hitay an pfehtha ja pangnomnoman chi Hudju chin nunlenehan Judas Makabeus ay ni templo chin 165 B.C. ta midaton khu ay Apo Jos. (John 10:22)

**Pfehthan chi Pentekostes** Hitay ja pfehthan chi Hudju an punyamanan cha ay Apo Jos ay ni pfento' cha. Me'chehhan ay ni me-a-lemay polo an arkhaw hi napfalinan chin munnaud an napfalon an pfehthan chi Hudju an hija hini pfehtha an Nalohan chin Angher. Ja hini penhod tay Pentekostes an hapiton ja hini

me-a-lemay polo an arkhaw. (Acts 2:1)

**Pfehthan chi Tenapay an Ma-id Pfino'pfo' na** Hitay ja pfehthan chi Hudju an me'chehhan ay ni arkhaw an 15 ingkhana hi 22 ay ni pfulan Nisan (penghan chi markhachu chi April). Ay ni me-ahimpolo ta han tolo an arkhaw chi Nisan ja khun cha ánun an amin hini pfino'pfo' an gwa ay ni nunhitugwan cha ta i cha poolan ay ni me-a-himpolo ta han apat an arkhaw. Mete-a ay chuy ja achi cha idchuman hini tenapay cha hi pfino'pfo'. Aton cha hitay ta pangnomnoman cha chin nakakan hachi a-ammod cha ad Egypt. Ti ay chuy ja un cha nun-ekhalakhar an nakak ad Egypt ja ma-id timpo cha an munhakha'-ang hi tenapay an mipala'-ukhu. (Matthew 26:17)

**Rabbi** Hapit chi Hudju an hay penhod na an hapiton ja mehtolo wenna manudtuchu. (John 1:38)

**Rome** Hitay ja oha an ciudad an capital chi Italy. Cho-or hachi pfuglay an enab-apfak hana eRome chin timpon Hesus an inidchum cha ay ni pun-ap-apugwan cha. (Acts 18:2)

**Saducee** Hana Saducee ja grupon chi Hudju an cho-or chi anila cha an oma'-atan ni urchin Moses. Hini mano'cho'-or ay chicha ja papachi. Pattiyon cha hana



lema an libju ay ni Da-an an Tulag an intula' Moses, muti achi cha mamati hana uchumna an libjun hachi profeta. Intuchu cha an ma-id amahuwan chi nun-atoy. (Matthew 22:23) Achi cha pattiyon an gway lennagwan chi tatakhu, ja achi cha khu pattiyon an gway angher ja dimonyo.

**Samaria** Hitay ja han pfuglay an numpfattanan chi Judea ja Galilea. Hana eSamaria ja mistiso an Hudju ja nat-on khu hana ugwali cha. Hotti hachi Hudju ja hana eSamaria ja khun cha munchichinnu'-ukhan ja munpipinnahiw. (John 4:9)

**Sanhedrin** Hitay Sanhedrin ja han grupon chi tatakhu an khun manugi an amin hana tatakhu ad Israel. Hini nangnangruna an tamu cha ja chichay mangchalom hana mangtutduchu hana mekontra ay ni pammati cha ja hana mamarpfalijan hi tatakhu. Hini pfilang hato an membron chi Sanhedrin ja petompolo cha ta han oha an linala-e, midchum hana a-ap-apon chi papachi ja hachi uchumna an memehtolon chi Urchin Moses ja hana uchumna an ma-ar-ali an linala-e. (Matthew 5:22)

**Satanas** Hi Satan as ja ap-apon chi napukhit an ispiritu wenno dimonyo. Chin hunhunana ja angher Apo Jos an nangato chi haad na. Muti ay numpa-akhaja ja podhona an

artapan hi Apo Jos. Hotti empakak Apo Jos hichi ad langit ja nidchum hana angher an ne'-op ay hija an pfimmuhur ay Apo Jos. Gawwacha cha heto lota ad ugwani an khun umallilaw ja manopngan hi tatakhu. (Mark 1:13)

**Sinagoga** Hitay sinagoga ja khun a-amungan hachi Hudju an mundayaw ay Apo Jos nun Hapfachu an arkhaw chi ngilin. Hana uchumna an arkhaw ja usaron cha hi pun-ehkolan hana empfpafalay cha an linala-e. An amin chi pfuglay chi Hudju ja gwa han sinagoga. (Matthew 4:23)

**Sion** Hitay Sion ja ciudad chi Hudju an hija hini Jerusalem. (Matthew 21:5)

**Talento** Hini ohan talento ja pfalor na hini 6,000 an denarius. Hini oha an denarius ja pfalor nay pfino'lan ni ohan takhu hi hen-arkhaw.

**Templo** Hini templo ja otong an pundayawan chi Hudju ad Jerusalem an allon cha hi Pfalay Apo Jos. Un oh-ohha hini templon chi Hudju. Hichi ja angkhay chi khun cha pamartiy an hana idaton cha ay Apo Jos. (Matthew 21:12)

**Tiberius** Hija chin Emperador ad Rome nete-a chin 14 A.D. ingkhana hi 37 A.D. Hija chi Emperador chin nangte-aan John an Bautista an khun muntutduchu. (Luke 3:1)

**Trono** Hitay ja na-ar-artiyan an umpfunan chi ari. Hijay

simbolon ni kina-ap-apo na ja umpfunan ni ari hi timpon chi okasyon. (Acts 12:21)

**Ubas** Hitay ubas ja oha an nitanum an amat hi gwa-ar hini tungar na. Hini pfunga na ja maphod hi ephod cha hi ma-inum. (Matthew 7:16)

**Urchin** Hini allon chi Hudju an urchin cha ja an amin hini nitula' ay ni lema an libjun Moses an nidchuman hana himpolo an urchin. Nginadnan cha khu hi urchin Moses.

Mapfalin khu an allon cha hi urchin an amin hana libju an gwa ay ni Daan an Tulag. (Matthew 5:18; Matthew 7:12)

**Zealot** Hay hato Zealot ja han grupon chi Hudju an ngumangannu hi governo ti achi cha apfuluton an mun-ap-apo chi pfu-un Hudju ay chicha. (Matthew 10:4)

**Zeus** Hija hini napfagpfagtuwan an jos chi Griego. (Acts 14:12-13)